

Խ. Ա. Թորոսեան, Թագակիրների Պատմութիւնն Ու Գովա-
րանութիւնը Որպէս Ջաքարեան Հայաստանի Պատմութեան
Սկզբնադրիւր, բնագրի թարգմանութեամբ եւ մեկնաբա-
նութիւններով հանդերձ, Հայաստանի ԳԱ Հրատարակութիւն,
Երեւան, 1992, 611 էջ:

Հայաստանի պատմութիւնը ԺԲ դարի կէսերից մինչեւ ԺԳ
դարի սկիզբը հայ ժողովրդի գարաւոր ազատագրական պայքարի
փառաւոր մի շրջան է, երբ սելջուկներից ազատագրում է երկրի
զգալի մասը եւ վերականգնում ԺԱ դարում կորցրած պետակա-
նութիւնը: Հայաստանի Ֆէոտալական ռազմական ուժը, որը Բիւ-
զանդիայի, ապա սելջուկեան նուաճումների պատճառով մասամբ
կազմալուծուել էր եւ մասամբ հեռացել երկրից՝ նշուած ժամանա-
կահատուածում աստիճանաբար կազմաւորում է որպէս բանակ, Ֆէ-
ոտալական միջավայրում առաջ է գալիս նոր աւագանի ի դէմս
Ջաքարեան իշխանական տոհմի, որը համախմբելով դեռեւս դոյա-
տեւած Ֆէոտալական դասը՝ ստեղծում է ուժեղ բանակ, վտարում
երկրից նուաճողներին եւ հիմնում անկախ իշխանութիւն: Այդ իշ-
խանութիւնը պատմագիտութեան մէջ անուանում է Ջաքարեան
իշխանութիւն, իսկ երկիրը՝ Ջաքարեան Հայաստան (Արշակունեաց
կամ Բագրատունեաց Հայաստանի նմանութեամբ):

Նրա տարածքը, Գարեգին Յովսէփեանի ճիշդ գիտողութեամբ,
գերազանցում էր Բագրատունեաց եւ Սիւնեաց թագաւորութիւն-
ների ընդհանուր տարածքին:

Պայքարի տարիներին Ջաքարեանները համագործակցել են
Վրաց թագաւորութեան հետ, սկզբնապէս նրանց զօրքը կուուել է
վրաց բանակի կազմում: Ջաքարեանների աւագանին (Սարգիս
Մեծ գորավարը, նրա որդիներ Ջաքարէն եւ Իւանէն, եղբորորդի-
ները եւ միւսները) ազդեցիկ դիրք են գրաւել վրաց արքունիքում,
նպաստել վրաստանի հզօրացմանը:

ԺԲ-ԺԳ դարերում ազատագրական պայքարի մասին հայ
պատմագրութեան մէջ գրուել է բաւականին շատ, լուսաբանուել
են ինչպէս ազատագրական պայքարը՝ այնպէս էլ նորաստեղծ իշ-
խանութեան կարգավիճակը, վարչաքաղաքական կարգը, սոցիալ-
տնտեսական յարաբերութիւնները, համագործակցութիւնը Վրաց
թագաւորութեան հետ: Դրա շնորհիւ պատմագիտութիւնը որոշա-
կի պատկերացում ունի նշուած դարաշրջանի Հայաստանի քաղա-
քական եւ սոցիալ-տնտեսական կեանքի մասին:

Բայց ժամանակի ընթացքում փոխում են գիտությունների պահանջները. այժմ հայ պատմագիտության առջև ծառայել է կարևոր խնդիր՝ շարունակել դարաշրջանի պատմության ուսումնասիրությունը՝ համագործակցելով միևս գիտությունների հետ (իրաւագիտության, հնագիտության, դրամագիտության, հերալդիկայի, աղբիւրագիտության եւ այլն): Անշուշտ, այդպիսի համագործակցություն եղել է նաեւ նախկինում, բայց այն կատարուել է նեղ շրջանակներում, արուել են միայն առաջին քայլերը:

Այժմ աւելի խորը պէտք է ուսումնասիրուեն տուեալ ժամանակաշրջանի հասարակության զարգացման օրինաչափությունները՝ նրա ինստիտուտները, պարզաբանուեն մասնագիտական տերմինները, աւելի լայն օգտագործուեն յարակից գիտությունների տրեւախները: Այս տեսակէտից շատ ուշագրաւ է իրաւագիտական գիտությունների դոկտոր Խ. Թորոսեանի վերջերս լույս տեսած գրախօսուող աշխատությունը:

Զաքարեան Հայաստանի պատմության մի շարք կարեւոր (կ'ասէինք՝ առաջնային) հարցերի գիտական պարզաբանման համար մեծ արժէք է ներկայացնում վրաց Թամար Թագուհու (1184-1213) անանուն պատմիչի երկը, որի խորագիրն է՝ Թագակիրների Պատմութիւնն ու Գովարսանութիւնը: Նախկինում, 1936 թուին, այն թարգմանուել է ռուսերէն: Լ. Մելիքսէթ Բէկի թարգմանութեամբ նրա փոքր հատուածը լույս է տեսել հայերէն¹: Այժմ առաջին անգամ լույս է տեսնում երկի հայերէն ամբողջական թարգմանութիւնը:

Սոյն աղբիւրի թարգմանութիւնը կարեւորոււմ է նրանով, որ նրա տուած տեղեկութիւնների օգնութեամբ հնարաւոր է լուսաբանել մի շարք հարցեր, որոնց մասին հայկական աղբիւրները բաւարար չափով տուեալներ չեն հաղորդում, ինչպէս նաեւ յստակութիւն մտցնել դարաշրջանի հայ-վրացական քաղաքական յարաբերութիւններին վերաբերող հարցերում: Խ. Թորոսեանի նպատակն էլ եղել է նախ սոյն կարեւոր սկզբնաղբիւրը մատչելի դարձնել հայագէտ պատմաբաններին եւ երկրորդ՝ պատմաիրաւագիտական քննութիւն կատարել ԺԲ.-ԺԳ. դարերի պատմության մի քանի հանգուցային հարցերի շուրջ: Այդ քննութիւնը տրուած է որպէս մեծածաւալ «Առաջաբան-ուսումնասիրութիւն» (227 էջ) եւ ըստ էութեան՝ ինքնուրոյն աշխատութիւն է:

«Առաջաբանի» առաջին երկու գլուխները նեղ բանասիրական-վրացագիտական բնութի են եւ պէտք է գրախօսուեն համապատասխան մասնագէտների կողմից: Դարաշրջանի պատմութեա-

նը, պատմական աշխարհագրութեանն ու ազգաբնակչութեանն են վերաբերում Գ.-Ե. գլուխները: Գ. գլուխը վերնագրուած է «Հայաստանն ու հայերը Թագակիրների պատմութեան գովաբանութեան մէջ»: այն բաժանուած է երկու խոշոր մասերի՝ «Սոմխեթի-Սոմխիթի» (էջ 116-150) եւ «Սոմեխնի-Սոմխիթարնի» (էջ 150-166):

Պարզաբանելով սոյն հարցը՝ Խ. Թորոսեանը գրում է որ վրացիները հայերին անուանում են «սոմեխի», իսկ երկիրը «Սոմխեթի», սակայն «Թագակիրների Պատմութեան» մէջ Սոմխեթի երկրանունը բացակայում է եւ գործածուած է Սոմխիթի տեղանունը: Խ. Թորոսեանի կարծիքով՝ դրանք համարժէք են, եւ մէկը միւսի տարբերակն է: Սակայն վրացագիտութեան մէջ այդ երկուսը զանազանուած են. Սոմխեթի նշանակում է Հայաստան, իսկ Սոմխիթի՝ ստորին Քարթլի (Քվեմօ Քարթլի): Եթէ այդպէս է՝ ապա «Թագակիրների Պատմութեան»-ը չի կարող հայ ժողովրդի պատմութեան սկզբնաղբիւր լինել²:

Վկայակոչուած են վրացագէտների տեսակէտները (Իւ. Զաւախիշվիլու եւ նրան հետեւող միւս գիտնականների գրույթները): Այնուհետեւ Խ. Թորոսեանը հիմնաւորում է իր գրույթը՝ թէ «Թագակիրների Պատմութեան» մէջ «Սոմխիթի» բառը հանդիպում է 15 անգամ եւ միշտ՝ որպէս Հայաստան (մէջբերուած են բոլոր 15 օրինակները)³: Խ. Թորոսեանը դրանից եզրակացնում է, որ «Թագակիրների» հեղինակը բերուած օրինակներում նկարագրել է դէպքեր, որոնք տեղի են ունեցել Հայաստանում, բայց միշտ Սոմխեթիի փոխարէն գրել է Սոմխիթի, որովհետեւ տարբերութիւն չի դրել այդ երկուսի միջեւ⁴:

«Թագակիրների Պատմութեան» մէջ հայերը լիշատակուած են «սոմեխի» եւ «սոմխիթարնի» եզրույթներով: Ինչպէս լայտնի է՝ առաջին տերմինը նշանակում է հայեր. «պղտորուած է» երկրորդի իմաստը: Ս. Ղաուշիշվիլին եւ Կ. Կեկելիձէն «սոմխիթարնի» բառը բացատրում են որպէս Սոմխիթի բնակիչներ, իսկ նրանք, ըստ այդ վրացագէտների, հայեր չեն: Ա. Բաքրաձէի կարծիքով «սոմխիթարնի» նշանակում է «ստորին քարթլեցիներ»: Այս գրույթը նախորդ գրույթի տրամաբանական շարունակութիւնն է⁵:

«Պատմութեան» մէջ «սոմխիթարնի» էթնիկական անունը լիշատակուած է բազմիցս: Թուարկելով համապատասխան օրինակները⁶ Թորոսեանը մատնանշում է, որ սոմխիթարները միշտ լիշուած են քարթլեցիներից անջատ. նրանք ապրում են որոշակի տարածքում, որը դուրս է Քարթլիից, այն է՝ Սոմխիթում, այսինքն՝ Հայաստա-

նում: «Սոմխիթարնի»ի "աբ" անանցը ցույց է տալիս ծագումը բնա-
կատեղիից (տարածքից)⁷: յոգնակի ձեւն է "աբ-ու" (օր. օգիշարնի,
սամցխեթարնի եւ այլն)⁸: Ըստ այսմ եզրակացնում է Խ. Թորոսեա-
նը՝ «սոմխիթարնի» նշանակում է Սոմխիթի բնակիչներ:

Թորոսեանը բացատրում է, որ «սոմխիթ-ար-նի» բառն առա-
ջացել է Սոմխիթի երկրանունից եւ նշանակում է սոմխիթցիներ:
Բայց վրացերէնում «հայ» բառի յոգնակի ձեւն է «սոմխեթ-նի».
դա նշանակում է, որ մի դէպքում տեղանունն առաջացել է ցեղա-
նունից, միւս դէպքում՝ ցեղանունը տեղանունից⁹: «Թագակիրնե-
րի»ի հեղինակը մէկ հայերին անուանում է նրանց ցեղանունով
(սոմխնի), մէկ ցեղանունը մակաբերում է նրանց երկրանունից:
Ճիշդ այդպէս էլ՝ կախերի, հերերի եւ մեսխերի անուան դէպքում¹⁰,

Չորրորդ գլուխը վերնագրուած է «Ջաքարեանները "Թագա-
կիրների Պատմութեան եւ Գովարանութեան" մէջ»¹¹: Այս գլուխը
բաղկացած է երեք մասից՝ Ջաքարեանների տոհմաձառք, տոհմա-
նունը եւ ազգային-կրօնական պատկանելիութիւնը: Խ. Թորոսեանն
անդրադառնում է Ջաքարեանների այն ներկայացուցիչներին, ո-
րոնք վկայուած են Թագակիրների Պատմութեան մէջ (դրանք են
Սարգիս Մեծը, նրա որդիները՝ Ջաքարէն եւ Իւանէն, առաջինի
որդի Շահնշահը, Սարգսի եղբայր Վահրամը՝ իր որդիներով եւ
թոռներով: Ընդ որում Վահրամը նշուած է միայն թարգմանուող
աղբիւրում): Տրուած են նաեւ Ջաքարեանների երկու կրտսեր ճիւ-
ղերի՝ Թմոզուեցիների եւ Ախալցխացիների, ինչպէս նաեւ տոհմի
բոլոր ճիւղերի ամփոփիչ տոհմաձառերը¹²:

Վրացագիտութեան մէջ Ջաքարեանների տոհմը կոչւում է
Մխարգրձելի, իսկ հայագիտութեան մէջ՝ Ջաքարեան եւ Երկայնա-
բագուկ: Նրանց Մխարգրձելի է անուանում նաեւ «Թագակիրների
Պատմութեան» հեղինակը: Բայց վրացագէտները ձգտում են «ա-
պացուցել», թէ Մխարգրձելիները հայ չեն (յատկապէս՝ Ս. Ջանաշ-
խան), թէ «Մխարգրձելի» ոչ թէ աւելանուն է (մականուն), այլ՝
տոհմանուն: Այդ հողի վրայ, վերջին տասնամեակներում ծագել են
վէճեր¹³:

Քննելով Մխարգրձելի-Երկայնաբագուկ անուանումների ծագ-
ման հարցը՝ Խ. Թորոսեանը մատնանշում է, որ «Թագակիրների
Պատմութեան» հեղինակը առաջինն է վրաց մատենագրութեան
մէջ Ջաքարեաններին անուանում «Մխարգրձելի», Սարգիս Մեծի
ծագումը կապելով պարսից Արտաքսերքսէս Երկայնաբագուկի
տոհմի հետ: Ըստ Թորոսեանի՝ Մխարգրձելի-Երկայնաբագուկ մա-
կանուան ակունքը ոչ թէ բնական՝ այլ գրքային ծագում ունի:

«Մխարզրձեյի» եզրույթի աղբիւրներն են յունա-հռոմէական երկերը: Լատինական աղբիւրներում արքան կոչւում է «լոնգի-մանուս» (երկար ձեռք), նոյնը յունարէնում՝ «մակրոխէյր» եւ պարսկերէնում՝ «դիրազ-դեստ»: «բագուկ» անունը եւ «մակրո-խէյր» յունարէն բառը թարգմանել է «Մխարզրձեյի»¹⁴: Այսպիսով, եզրակացնում է Թորոսեանը, «Երկայնաբազուկ» բառը մեր օրերում հայագէտների ստեղծած բառը չէ, ինչպէս կարծում են վրացագէտները: այն գործածուել է հնում: Թորոսեանը գտնում է, որ Ջաքարեանները անուանուել են «Մխարզրձեյի» ԺԲ. դարի 20-ական թուականներին, երբ հայերը Դաւիթ Շինարարի բանակում կուում էին սելջուկների դէմ. առաջինը այդ անունը կարող էր կրել Սարգիս Մեծի հայրը՝ Ջաքարիա Ա-ն:

Հինգերորդ գլուխը՝ «Ջաքարեանների վերելքն ու ինքնուրոյնութիւնը»՝ պատմագիտութեան համար, թերեւս, ամենակարեւորն է: Այստեղ քննւում է Ջաքարեան Հայաստանի քաղաքական կարգավիճակը (ստատուսը):

Ջաքարեանների կարգավիճակը որոշելիս, գրում է Հեղինակը, պատմագիտութեան մէջ կատարուել եւ կատարւում է շատ սկզբունքային սխալ, որ միանշանակ է նրանց պատմութեան ամբողջ ժամանակաշրջանի համար: Այնինչ՝ Ջաքարեանների պատմութիւնը բաժանւում է մի քանի ժամանակահատուածների, որոնք իրենց հերթին բաժանւում են ենթաշրջանների:

Այդ ժամանակահատուածներն են.

1. Ջաքարեաններն իրենց սկզբնական բնակութեան վայրում,
2. Ջաքարեանները Տաշիր-Չորագետում (նրանք Կիւրիկեան թագաւորների վասալներն են),
3. ԺԲ. դարի 10-20-ական թուականներին վրաց թագաւոր Դաւիթ Շինարարը վերացնում է Կիւրիկեանների թագաւորութիւնը եւ նրա տարածքը միացնում վրաստանին: Այս ժամանակուանից Ջաքարեանները, դարձեալ գտնուելով հայրենիքում, յայտնւում են վրաց քաղաքական համակարգում:

Սկսում է որակապէս նոր ժամանակաշրջան, որը բաժանւում է փուլերի.

1. Ջաքարեանները վրաց թագաւորների, ապա Օրբելիների, նորից վրաց թագաւորների (1177-ից) վասալներ են մինչեւ 80-ական թուականների կէսերը,
2. Ջաքարեանների պատմութեան ամենակարեւոր փուլը՝ հօրութեան բարձրակէտը ինքնուրոյնութեան շրջանն է: Դրա առանձին ենթափուլերն են.

ա. սկզբնական, ինքնուրույնացման շրջան, որն իրաւական ձեւակերպում է ստանում 1185 թուին եւ տեւում է մինչեւ 1199 (Անիի ազատագրումը) կամ ամենաուշը՝ մինչեւ 1203 թուականը (Դուինի ազատագրումը),

բ. ինքնուրույնութեան շրջան՝ ժԲ. դարի վերջից կամ ժԳ. դարի սկզբից մինչեւ մոնղոլական տիրապետութեան հաստատումը,

գ. Զաքարեանների թուլացման եւ պատմական ասպարէզից վերանայու շրջան ժԳ. դարի կէսերից մինչեւ ժԴ. դարի վերջ: Այս ժամանակաշրջանը եւս ունի ենթաշրջաններ¹⁵,

Թուարկուած փուլերից հեղինակը քննում է միայն այն ժամանակահատուածները, որոնք արտայայտուած են սկզբնադրուած «Թագակիրների Պատմութեան» մէջ:

Միւս ժամանակաշրջանների պատմութիւնը քննում է առանձին մենագրութեան մէջ, որը հեղինակը նախապատրաստել էր հրատարակութեան¹⁶:

Խ. Թորոսեանն իրաւացիօրէն ընդօժոււմ եւ կարեւորում է այն հանգամանքը, որ Զաքարեանների կարգավիճակը որոշելիս անհրաժեշտ է հաշուի առնել տուեալ ժամանակաշրջանում Զաքարեանների եւ վրաց պետութեան յարաբերութիւնների բնութիւնը՝ աւել կամ պակաս կախուածութիւն վրաստանից, անկախութիւն եւ այլ հանգամանքներ¹⁷: Շատ տեղին դիտողութիւն է, քանի որ վրաց եւ հայ պատմագիտութեան մէջ Զաքարեանների պատմութեան պարբերացման ու կարգավիճակի էական փոփոխութիւնները պարզապէս անտեսուում են:

Յայտնի է, որ Սարգիս Մեծը նշանակուել է վրաց ամիրսպասայար 1185 թուին, իսկ Սանահնի Ամենափրկիչ եկեղեցու արձանագրութեան համաձայն՝ նա ամիրսպասայար էր 1181 թուին: Խ. Թորոսեանը աւելի մանրամասն, քան իր նախորդները (Լ. Բարսեղեան, Յ. Մանանդեան) բացատրում է այս թուացող հակասութիւնը, որը շփոթութեան մէջ է դրել նախորդ ուսումնասիրողներից ոմանց: 1181 թուին (գուցէ առաջ) Սարգիսը եղել է Հայկական դորամասերի հրամանատար (ամիրսպասայար), իսկ 1185-ին նշանակուել է Հայոց եւ վրաց ամիրսպասայար¹⁸:

Զաքարեան Հայաստանի պետական-իրաւական կարգավիճակի հարցը լուծող փաստ է վրաց պատմիչի վկայութիւնը այն մասին, որ Թամար թագուհին Սարգիս Զաքարեանին նշանակելով ամիրսպասայար՝ շնորհել է նրան նաեւ Լոռին, որպէս սամթաւրօ եւ սաքաւադօ. այդ պահից էլ սկսում է Զաքարեան Հայաստանի

ինքնուրոյնութիւնը:

Սոյն փաստը հալ եւ վրաց պատմագիտութեան մէջ լիովին անտեսուել է, ի հարկէ տարբեր դրդապատճառներով:

Արդ, գրում է Խ. Թորոսեանը, ո՞վ է մթաւարը եւ ի՞նչ է սամթաւրոն: Վրացագէտների վկայութեամբ (իրաւագէտ Ի. Սուրգուլաձէ, պատմաբան Օ. Սոսելիա) մթաւար բառը բազմիմաստ տեքստին է: Այն նշանակում է դիդերուլ (մեծամեծ), էրիսթաւ (թագաւորի պաշտօնեայ), սամթաւրոյի կառավարիչ-հրամանատար, անկախ քաղաքական միաւորի տէր, տիրակալ-թագաւոր: Իսկ սամթաւրօ նշանակում է անկախ քաղաքական միաւոր, սուվերէն պետութիւն¹⁹: Այս նոր կարգավիճակը հիմք է տալիս Խ. Թորոսեանին իրաւացիօրէն եզրակացնելու, որ «Լոռի-Տաշիրը», որ մինչ այդ գտնւում էր վրացական պետութեան կազմի մէջ ու նրա վարչատարածքային միաւորներից էր, հաւանաբար էրիսթաւութեան ձեւով, դառնում է առանձին՝ քաղաքական միաւոր՝ վրաց պետութեան տարածքային կազմից դուրս, իսկ դրա կառավարիչը՝ ինքնուրոյն տիրակալ: Անշուշտ, չպէտք է կարծել, թէ այդ ինքնուրոյնութիւնը դարձաւ բացարձակ. նախկին կախումութեան որոշ նշաններ, որոշ ժամանակ դեռ պահպանւում էին, բայց հիմնականը, գլխաւորը կատարուած էր. փաստական ինքնուրոյնութիւնը ձեռք էր բերուել եւ այն գնալով աւելի խորանում եւ լայնանում էր²⁰:

«Պատմութեան» հաղորդած տուեալներով Խ. Թորոսեանը հիմնաւորում է իր եզրակացութիւնը Չաքարեանների ինքնուրոյնութեան մասին. արշաւանքների ժամանակ Չաքարեանների զօրքը որպէս կանոն գործում է առանձին վրաց (թագաւորի) բանակից: Դա նշանակում է միայն մի բան՝ ինքնուրոյնութիւն²¹: Առանձին դէպքերում կուում էր հալ-վրացական միացեալ զօրքը (օրինակ՝ Շամքորի գրաւման ժամանակ). 1185-ից Չաքարեանների «տունը» (նստավայրը) դառնում է Լոռին, իսկ 1199-ից՝ Անին: Այսինքն նրանք ապրում էին ոչ թէ Տփղիսում, այլ իրենց սամթաւրոյում²²:

Վրացերէնում մթաւար նշանակում է թագաւոր, իսկ սամթաւրօ՝ նաեւ թագաւորութիւն: Բայց հայերէնում թագաւորութիւն կոչւում է միայն այն քաղաքական միաւորը, որը գլխաւորում է թագաւորը: Այդ պատճառով Խ. Թորոսեանը Չաքարեանների քաղաքական կազմաւորումն անուանում է «իշխանա-պետութիւն»՝ որովհետեւ դա պետութիւն էր, որը գլխաւորում էին իշխանները, այլ ոչ՝ օծեալ թագաւորները: Բայց Չաքարէն կեանքի վերջում (վերջին 10-15 տարիներին) այնքա՛ն էր հզօրացել՝ որ ժողովուր-

դը նրան անուանում էր թագաւոր²³։ Աւելացնենք, որ ոչ միայն ժողովուրդը՝ այլև ազնուականները Զաքարեանների տան գահէն-րէցներին համարում էին թագաւոր։ Այդ մասին բազմաթիւ վկա-յութիւններ կան վիճական արձանագրութիւններում։

Այսպիսով, եզրակացնում է Խ. Թորոսեանը, «Թագակիրների Պատմութեան» հեղինակի տեղեկութիւնները Զաքարեանների եւ վրաց թագաւորների յարաբերութիւնների մասին ցոյց են տալիս, որ Զաքարեանները Թամարի թագաւորութեան առաջին իսկ տա-րիներին հասնում են ինքնուրոյնութեան եւ վրաց պետութիւնը ճանաչում է Զաքարեանների ինքնուրոյնութիւնը։ Դրանից չետոյ Զաքարեանների քաղաքական կապերը Վրաստանի հետ ոչ թէ վա-սալական էին՝ այլ միջպետական, քանի որ նրանք հանդէս են գա-լիս որպէս վրաց թագաւորների դաշնակիցներ²⁴։

Այս դրոյթը հալ պատմագիտութեան մէջ հիմնաւորում է ա-ռաջին անգամ. այն նպաստում է աւելի յստակ եւ իրական պատ-կերացնելու Զաքարեան Հայաստանի կարգավիճակը, նրա սուվերէ-նութեան աստիճանը եւ փոխ-յարաբերութիւնների բնույթը վրաց թագաւորութեան հետ։

Խ. Թորոսեանի առաջ քաշած դրոյթի երկու գլխաւոր կէտերն են՝ Հայաստանի անկախութիւնը սամթարոյի կարգավիճակով եւ նրա դաշնակից յարաբերութիւնները վրաց թագաւորութեան հետ։

Դա միանգամայն նոր մօտեցում է Զաքարեան Հայաստանի քաղաքական կացութեան նկատմամբ 1185-ժԳ. դար, եւ կարող է որոշ տարակուսանք առաջացնել, քանի որ տասնամեակներ շարու-նակ ուսումնասիրութիւնները կատարուել են այլ սկզբունքով։ Ին-քը՝ հեղինակը «Առաջաբանի վերջում գրում է, որ ծանօթանալով սոյն ուսումնասիրութեանը՝ ուսումնասիրողի մօտ կ'առաջանան հարցեր, զատ նրանցից, որոնք բացատրուել են։ Բոլոր այդ հար-ցերի (կամ նրանց մեծ մասի) պատասխանը տրուած է նոյն հեղի-նակի երկու այլ մենագրութիւններում, որոնցից մէկը նուիրուած է Զաքարեաններին, միւսը՝ Զաքարեան Հայաստանին²⁵։

Շատ ցաւալի է, բայց նշուած երկու մենագրութիւնների հրա-տարակումը չետաձգուել է անորոշ ժամանակով հեղինակի վաղա-ժամ մահուան պատճառով։ Իսկ նրա կողմից առաջարկուած նոր մեկնաբանութիւնները սկզբունքալին նշանակութիւն ունեն Զա-քարեան Հայաստանի քաղաքական կացութիւնը պատմա-իրաւա-կան իրական հենքի վրայ հասկանալու համար։ Այդ պատճառով՝ նպատակալարմար ենք համարում լրացուցիչ մի քանի փաստար-կումներ բերել յօգուտ Խ. Թորոսեանի դրոյթի՝ լուսալով որ

նրանք կը նպաստեն նրա տեսակէտների անաչառ գնահատմանն ու արժեքաւորմանը:

Չնայած 1185 թուին Լոռին դառնում է սամթաւրօ՝ Սարգիս ամիրսպասալարի որդիները՝ Ջաքարէն եւ Իւանէն վրաց արքունիքում վարում էին ոչ բարձր պաշտօններ, Ջաքարեանների տան միւս ներկայացուցիչների հետ մասնակցում վրաստանի մղած պատերազմներին եւ աւարտից լետու ներկայանում վրաց թագաւորներին²⁶: Դրա հետ մէկտեղ՝ Ջաքարէի եւ Իւանէի նստավայրը մընում էր Լոռին (այլ ոչ թէ Տփղիսը): «Թագակիրներին»ի հեղինակը գրում է, որ 1191 թուին ամիրսպասալարի պաշտօնը շնորհուեց Ջաքարէին, «որ նստում էր հայերի թագաւորների տեղում եւ տէրն էր Լոռու»²⁷:

Լոռին Ջաքարեանների ժառանգական տիրույթ լինելու փաստը հաստատում է նաեւ Սանահին-Հաղբատ վանքերի բազմաթիւ արձանագրութիւններով, իսկ 1189 թուին Ջաքարէն եւ Իւանէն Սանահնում կառուցեցին տոհմական տապանատուն²⁸: Այսպիսով, Սարգիս Մեծի մահից (1187) լետու էլ Լոռին մնում էր Ջաքարեանների սամթաւրոն:

Ջաքարեանների գլխաւոր տան կարգավիճակը (մի կողմից՝ անկախութիւն, միւս կողմից՝ «ծառայութիւն» վրաց արքունիքում) հակասութեան տպաւորութիւն է թողնում: Սակայն «հակասութիւնը» միայն թուացող է եւ հարթւում է Խ. Թորոսեանի բացատրութեան շնորհիւ, որ 1185 թուին Ջաքարեաններն ու վրաց թագաւորութիւնը դառնում են դաշնակիցներ:

Ջաքարեանները վրաց արքունիքում ստանում էին պաշտօններ (1191-ին՝ ամիրսպասալարի կամ գերագոյն հրամանատարի, մսախորթ-ուխուցեւի կամ արքունի վեզիրի եւ այլ): Որպէս դաշնակիցներ՝ վրաց թագաւորութիւնն ու Ջաքարեանները (այսինքն՝ Հայաստանը) հարկ եղած դէպքում պատերազմում էին միասին, բայց կարող էին պատերազմել նաեւ առանձին:

Օրինակ, Իւանէն մասնակցել է Առան ձեռնարկած մեծ արշաւանքին, բայց նրա զօրքը կուում էր «առանձին» եւ միայն Գեղարքունիքում: «Թագակիրներին»ի հեղինակը գրում է. «Մսախորթ-ուխուցէս Իւանէն, առանձին, տուն ուղարկելով մեծ զօրքն ու անթիւ աւար, խաչինեցի դիդերուլներին բերեց թագաւորի առաջ»²⁹: Ընդ որում՝ Իւանէի «տուն» ասելով պատմիչը նկատի ունի Անին: Միաժամանակ Առանում կուուող վրացական բանակը Գանձալից [իմա՝ Գանձակից] ու այլ քաղաքներից հարկ առնելով՝ յաղթանակած վերադարձան իրենց թագաւորութիւնը ... »³⁰:

Զաքարեանների կարգավիճակը պարզելու համար բնորոշ է Իւանէի դիմումը վրաց թագաւորին՝ 1191 թուականից քիչ անց. «Դրանից յետոյ կայէնի տէրը՝ մսախուրթ-ուխուցէս Իւանէն հրաւիրեց Դաւթին³¹ արշաւանքի»³²: Հրաւէրը անսովոր է. հրաւիրողը ոչ թէ թագաւորն է՝ այլ նրա արքունի պաշտօնեան: Նոյնը տեղի ունեցաւ տարիներ անց, 1208-ին. Արղաբիլի սուլթանի դէմ մեծ արշաւանք կազմակերպելիս՝ նախաձեռնողները նորից Զաքարէն էր եւ Իւանէն: Կրօնական տօնի առթիւ նրանք ժամանել էին Գեղութ տեսակցելու թամար թագուհուն հետ, երբ իմացան, որ Արղաբիլի սուլթանը անսպասելի ներխուժել է Հայաստան եւ կոտորած կազմակերպել Անիում: Սուլթանից վրէժ առնելու նպատակով Զաքարեան եղբայրները որոշում են արշաւել Արղաբիլ եւ դիմում են թագուհուն. «Դու ով թագաւոր, ծանուցիր քո զօրականներին, որ պատրաստ լինեն Արղաբիլի վրայ արշաւելու: Մենք գնանք Անիսի եւ պարսիկներից ում որտեղ գտնենք՝ որսանք: [Մեծ թուով չենք գնալ] այլ փոքր, որովհետեւ եթէ մեծ թուով գնանք՝ կ'իմանան եւ կը մտնեն ամրոցները: Փոքրաթիւ զօրքով օգնիր ինձ: ... Թագաւորը հաւանեց նրանց սասածները: Եւ թագաւորը հրամայեց, որ իր զօրականները պատրաստ լինեն:

«Եւ երկայնաբազուկները գնացին Անիսի եւ սկսեցին պատրաստուել»³³:

Ուշագրութիւն պէտք է դարձնել, որ Զաքարեանները օգնական զօրք են խնդրում թագաւորից. վերջինը կարող էր զօրք տալ միայն որպէս դաշնակից՝ այլ ոչ թէ որպէս սիւզերէն իր վասալին:

Յաղթանակով վերադառնալով Արղաբիլից՝ Զաքարեանները չեն գնում Տփղիս ներկայանալու թագաւորին, ինչպէս կը վարուէր վասալը, այլ «եկան Անիսի», դրանից յետոյ գնացին թամար թագուհու մօտ «բերելով նուէրներ»³⁴:

Այդ փաստի առընչութեամբ Խ. Թորոսեանը իրաւացիօրէն նըկատում է, որ եթէ Զաքարեանները լինէին վրաց պետութեան քաղաքական համակարգում, ապա նրանք կը գնային Տփղիս, թամար թագուհու մօտ, բայց նրանք գնում են Անի՝ իրենց պետութեան մալրաքաղաքը եւ միայն այնտեղից գնում թագուհու մօտ եւ տալիս նրան նուէրներ, ինչպէս բարեկամից բարեկամին³⁵:

Դաշնակից կապերը աւելի սերտ էին դարձել սկսած 1197-1198 թուականներից: «Թագակիրուների»-ի պատմիչը գրում է, որ «թագաւորի մօտ եկան ծառայելու երկու եղբայրներ, Սարգիս ամիրսպասալարի որդիները, որոնք այն ժամանակ յոյժ մեծարուել էին թագաւորի կողմից՝ ամիրսպասալար Զաքարէն եւ մսախուրթ-ուխու-

ցէս իւանէն»³⁶:

Քանի որ այդ մեծարումը տեղի է ունեցել Փանձակի գրաւումից լեւոյ 1196 թուին՝ ուրեմն մօտաւորապէս 1197-1198 թուականներին, իսկ Սարգսի որդիները նշուած պաշտօնները ստացել էին 1191-ին, ապա պարզ է, որ մէջբերուած վկայութեան մէջ խօսքը գնում է Ջաքարեաններ-վրաց թագաւորներ (իմա՝ Հակական սամբարօ-վրաց թագաւորութիւն) կապերի նոր փուլի մասին: Ջաքարեան եղբայրները վրաց արքունիքում «ծառայութեան» մէջ էին 1197-1198 թուերին: շատ աւելի շուտ, 1185-1187 թուերին: Ուրեմն տուեալ դէպքում, «ծառայութիւն» եզրոյթը (տերմինը) շունի իր սովորական (վասայական պարտականութիւն) իմաստը, այլ արտացոլում է «ծառայութեան» նոր բնոյթը՝ դաշնակից յարաբերութիւն, Համագործակցութիւն, , ընդ որում՝ այդ Համագործակցութեան աւելի բարձր աստիճան, որովհետեւ դաշնակից կապերը սկիզբ էին առել աւելի շուտ՝ 1185-ից:

Այդ նոր որակը պարզ արտայայտում է «Թագակիրքների Պատմութեան» Հեղինակի հետեւեալ հաղորդումը:

Արդաբիլի արշաւանքից շատ շանցած «ի յայտ եկան ուրիշ մեծագոյն գործեր»՝ գրում է պատմիչը: Ջաքարէն, իւանէն, վահրամ Փակեցին դիմում են թագաւորին (Թամար թագուհուն)՝ «... Նայիր եւ տես ձեր թագաւորութիւնը եւ ... իմացիր, որ քո զօրականների մէջ կը գտնուեն բազում առնացի, քաջ ընտիր մարտիկներ ... գինաւորուենք ... եւ Հրամայիր վրաստանի զօրքին որ պատրաստ լինեն արշաւելու Խորասան:

«... Երբ թագաւորը լսեց Երկայնաբազուկների ասածը, հրաւիրեց այս թագաւորութեան բոլոր նշանաւոր մարդկանց ... եւ յայտնեց նրանց Երկայնաբազուկների ասածը: Երբ լսեցին, որ Երկայնաբազուկները արշաւանքի կոչ են անում՝ բոլորին դուր եկաւ նրանց ասածը, որոշեցին արշաւել եւ սկսեցին պատրաստուել» ... այնուհետեւ տրւում է արշաւանքի մանրամասն նկարագիրը³⁷:

Այս հաղորդման մէջ կարեւոր են հետեւեալ կէտերը:

ա. Ջաքարեանները վրաց թագաւորութիւնը կոչում են «ձեր», «այս»: Պարզ է, որ դա Ջաքարեանների թագաւորութիւնը չէ:

բ. Ջաքարեանները Թամարին ասում են՝ «հրամայիր վրաստանի զօրքին»: Ուրեմն, բացի վրաստանի զօրքից՝ կար նաեւ այլ զօրք պարզ է, որ դա Երկայնաբազուկների Հակական զօրքն էր, որը վրաստանի զօրքի կազմում չէր: վրաց թագաւորը ունէր «իր զօրքը»³⁸:

գ. Արշաւանքը նախաձեռնում են Ջաքարեանները, իսկ վրաս-

տանի նշանաւոր մարդոցն հաղորդուծ է ալդ մասին, նրանք քըն-
նուծ են առաջարկը եւ հաւանութիւն տալիս (ի հարկէ, կարող էին
եւ հաւանութիւն չտալ): Վասալները չէին կարող նման առաջարկ
անել: Ակնյայտ է, որ «ծառայ» բառը տուեալ դէպքուծ նշանակուծ
է ոչ թէ վասալ, այլ՝ դաշնակից:

դ. «Այս թագաւորութեան բոլոր նշանաւոր մարդիկ լսելով
Երկայնաբազուկների առաջարկը» արտայայտութիւնը պարզ նշա-
նակուծ է, որ Երկայնաբազուկները «այս թագաւորութեան», այն է՝
Վրաց թագաւորութեան նշանաւոր մարդկանց թուծ չէին:
Զաքարեանների սամբարոն Վրաց թագաւորութեան կազմից
դուրս գտնուելու մասին Խ. Թորոսեանի եզրակացութիւնը հաս-
տատող պերճախօս ապացոյց է:

Զաքարեան Հայաստանի կարգավիճակի նորովի հիմնաւորուծը
հնարաւորութիւն է ընձեռուծ ճշդելու կամ վերացնելու պատմա-
գիտութեան մէջ ընդունուած, բայց, մեր կարծիքով, վիճելի ա-
ռանձին տեսակէտներ: Դրանցից մէկն է հայ պետականութեան
անկման ժամանակի հարցը: Աւանդաբար նրա կորուստը կապուծ
է Բագրատունեաց թագաւորութեան անկման հետ (Անիի գրաւու-
ծը Բիւզանդիայի կողմից 1045 թուին: Իրականուծ այդպէս չէր:
ԺԲ. դարի վերջուծ հայ պետականութիւնը վերականգնուծ է իշ-
խանապետութեան կարգավիճակով: Վերջինս նույնպէս անկախ պե-
տութիւն է, նրա հիմնադրման տարեթիւն է 1185 թուականը: Նա-
խորդ ուսումնասիրողները եւս ընդունուծ են, որ ԺԲ.-ԺԳ. դարե-
րուծ Հայաստանը ունեցել է իշխանութիւն, բայց բնութագրուծ են
այն որպէս ինքնավարութիւն³⁹: Խ. Թորոսեանի ուսումնասիրու-
թիւնը նոր որակ է տալիս ԺԲ.-ԺԳ. դարերի հայ պետականու-
թեան ուսումնասիրութեանը եւ բոլոր հիմքերը կան ընդունելու
նոր դրոյթը, քանի որ այն ունի բաւարար աղբիւրագիտական բա-
զա (ընդ որուծ, պէտք է նշել նաեւ թարգմանուող սկզբնաղբիւրի
վերաբերեալ հեղինակի արժէքաւոր ծանօթագրութիւնները, թուով
300-ից աւելի):

Գրախօսուող աշխատութիւնը սկզբնաւորուծ է նոր փուլ ժա-
մանակակից հայ պատմագիտութեան մէջ, որը ուսումնասիրուծ է
Զաքարեան դարաշրջանը:

Նրա արժէքն այն է, որ ԺԲ.-ԺԳ. դարերի հայ պետականու-
թեան ուսումնասիրութիւնը դուրս է բերուծ հնացած շրջանակնե-
րից, նրանով սկիզբ է առնուծ դարաշրջանի ուսումնասիրման
նոր՝ պատմաիրաւական վերլուծութեան փուլը, որը նախորդի՝
պատմա-բանասիրական փուլի տրամաբանական շարունակութիւնն

է եւ նոր որակ է տալիս դարաշրջանի պատմութեան լուսարան-
մանը: Նրանում շարադրուած եզրահանգումները կը խթանեն Զա-
քարեան Հայաստանի պատմութիւնը հասկանալու նոր՝ աւելի ճիշդ
տեսանկիւնից:

ԳՈԿՏ. Ռ. Ի. ՄԱԹԵՒՈՍԵԱՆ

ԾԱՆՕԹԱԳՐՈՒԹԻՒՆՆԵՐ

1. Տես՝ Լ. Մելիքսէթ-Բեկ, Վրաց աղբիւրները Հայաստանի եւ Քայերի մասին,
հտ. Բ., Երեւան, 1936, էջ 7-25:
2. Տես՝ Խոսրով Թորոսեան, "Թագակիրների Պատմութիւնն ու Գովարա-
նութիւնը" Որպէս Զաքարեան Հայաստանի եւ Զաքարեանների պատ-
մութեան սկզբնաղբիւր, Երեւան, 1992, էջ 116: Յետապստ՝ "Թագակիրնե-
րի Պատմութիւնը":
3. Մանրամասն տես՝ Գոյն, էջ 138-145:
4. Նոյն, էջ 150:
5. Տես՝ Գոյն, էջ 150-151:
6. Նոյն, էջ 153-155:
7. Նոյն, էջ 156 եւ 157:
8. Նոյն, էջ 162-165:
9. Նոյն:
10. Նոյն, էջ 166:
11. Նոյն, էջ 167-253:
12. Նոյն, էջ 180:
13. Նոյն, էջ 181-183:
14. Նոյն, էջ 187 եւ 188:
15. Նոյն, էջ 254-256:
16. Տես՝ Գոյն:
17. Նոյն, էջ 256:
18. Նոյն, էջ 280-281:
19. Նոյն, էջ 283 եւ 331:
20. Նոյն, էջ 286-287:
21. Նոյն, էջ 313-315:
22. Նոյն, էջ 306, 310, 320, 324 եւ 330:
23. Նոյն, էջ 322:
24. Նոյն, էջ 321, 322 եւ 331:
25. Նոյն, էջ 331:
26. Նոյն, էջ 378, 387, 390, եւ այլք:
27. Նոյն, էջ 394, հմմտ. էջ 390:

28. Տես՝ Կ. Ղաֆադարեան, *Սանահնի վանքը և նրա Արձանագրութիւնները*, Երևան, 1957, էջ 178:
29. "Թագակիրների Պատմութիւնը", էջ 415:
30. Նոյն:
31. Այսինքն՝ Դաիթ Սոսլանին:
32. "Թագակիրների Պատմութիւնը", էջ 399:
33. Նոյն, էջ 439:
34. Նոյն, էջ 440:
35. Տես՝ նոյն, էջ 320-321:
36. Տես՝ նոյն, էջ 410:
37. Նոյն, էջ 441-442:
38. Նոյն, էջ 409:
39. Տես՝ *Հայ Ժողովրդի Պատմութիւն*, հտ. Գ., Երևան, 1976, էջ 543-544:

Ռ. Մ.